

DECLARATOIRE

1610. DE LA DOCTRINE DES
PERES IESVITES CONFOR-
me aux decrets du Concile de
Constance, adreesee à la Royn
mere du Roy Regente en France.

Par le Pere P. COTON, de la Compagnie
de IESVS, Predicateur ordinaire
de sa Maiesté. L. D. 140



A PARIS,
Chez CLAYDE CHAPPELET, rue
S. Iacques, à l'enseigne de la
Licorne.

M. DC. X.
Avec privilege du Roy.

Case


F

39

.326

1610 co

THE NEWBERRY
LIBRARY



A LA ROYNE

MEREDV ROY,

REGENTE EN FRANCE.



ADAME,

DIEU ordonnoit
en l'ancien Testament
que l'on ne fist bouil-

lir le cheureau dans le laiët de sa mere;
pour enseigner, comme l'expose
Philon le Iuif, qu'il ne faut surchar-
ger de nouuelle affliction celuy, qui
d'ailleurs est opprimé.

Suyuât ceste regle dictée de la mes-
me nature; ceux de nostre Societé es-
peroient qu'à ce funeste accident, qui

a esbranlé de sa secousse les deux Poles de la Chrestienté, ils auroiét du moins le soufle libre, pour souspirer apres leur incomparable perte : perte qui leur est autant particuliere, qu'elle est à tous generale & commune. Mais il leur en a pris comme à ceux, qui se rencontrent sous la ruine d'un edifice, où vne pierre n'attend l'autre pour courir & accabler ceux sur lesquels elle tombe. Nous estions de cœur & de corps occupez à la translation de ce precieux gaige & remarquable depost, qu'il pleut à vostre Majeste de faire consigner en nos mains par celles de Monseigneur le Prince de Conty, & auquel les principaux Seigneurs de la France rendirent les derniers honneurs; quand quelques vns peu affectionnez à la Religion Catholique, & à ceux de nostre professiō, pour nous descrier, & faire profit de nostre absence, semerent des

bruits tant esloignez de vraysemblance & probabilité, que l'on n'auroit jamais estimé, telles calomnies pouuoir entrer, ny mesmes en resuant, en l'opinion d'une ame raisonnable. Ce fut à l'occasion d'un mauuais liure, la doctrine duquel a esté à bon droit condamnée par la Cour de Parlement; les vns foustenant que la doctrine contenue audict liure estoit commune à tous les Iesuites; autres qu'elle estoit tellement particuliere à son Autheur, que plusieurs de la mesme Cópagnie auoient escrit au contraire, & tous ensemble l'auoient cōdamnée en corps de Congregation prouinciale, il y a quelques années. Different que les moins passionnez terminerēt, concludās que le desauœu en feroit la raison, & qu'il falloit attendre ce que nous en dirions. Surquoy ayant esté nommé en particulier; c'est Madame, ce qui me met presentement là plume en

main, pour vous représenter, comme à celle qui est vniquement affectionnée à la vraye Religion, la plus interessée au bié de cet estat, & le plus assésuré asyle que l'innocence puisse auoir, ce que les Docteurs de nostre Compagnie ont escrit sur ce subiect, sçachant que la grandeur des affaires ne vous permettroit aisément d'en faire par vous mesme la recherche; ny le peu d'affection que nous portent les mesdisans, de vous en faire le véritable rapport. Et apres cela ie declareray avec la mesme briefueté, quel est le sens cômun, quelle la creance de nostre Societé esparse par l'vniuers, touchât la matiere dont il est questiô. Le tout presupposât vne verité qui ne peut estre reuoquée en cōtrouerse, ny mesme par les haineux ou enuieux de cette florissante corône: A sçauoir que le subiect qui fut debatû au concile

7
de Constance & qui depuis a esté déclaré plus amplemēt par les Docteurs Catholiques, concernant l'expulsion des Tyrans ne touche en rien l'heureuse renommee & la tres-honorable memoire de celuy dont nous deplo-rons le tref-pas; sa vie ayant esté autāt elloignee du blasme de Tyrannie qu'ell' a esté & sera à iamais à tous les Monarques de la terre, le modele de de pieté, iustice, clemence, valeur, de-
bonnaireté, & affection paternelle enuers ses subiects.

En premier lieu, l'Illustrissime Car-
dinal Tolet se presente à nos yeulx,
personnage de rare sçauoir, Espagnol
de nation & François d'affectio. C'est
au liure cinquiesme de la Sôme, chapi-
tre sixiesme, où il enseigne en termes
exprés, qu'il n'est loysible d'atten-
ter sur la vie du Prince, ores qu'il
ab use de son pouuoir: & adiousté
que de maintenir le contraire c'est

une doctrine heretique condamnée
au Concile de Constance.

Le tres-Illustre & tres-docte Bel-
larmin respondant à ceste mesme ob-
jection; au chapitre treiziesme de sa
responce Apologetique au liure du
Roy de la grand Bretagne, dit ainsi, Je
n'ay iamais leu ny oüy dire que la vie
eternelle soit promise à ceux qui at-
tentent sur la vie des Rois; ains au co-
traire, i'ay leu que l'article qui dict,
tout Tyran peut & doit licitement estre
occis, fut iadis condamné en la
session quinziesme du Concile de
Constance. Bien est vray que Iean
Viclef Anglois, celuy que les Prote-
stans prisent tant, & les loüanges du-
quel ils ont placardé au frontispice
de leurs histoires, enseigna qu'il n'y a
plus de Seigneur Ecclesiastique ou
Ciuil depuis que l'un & l'autre est
tombé en quelque peché mortel. Er-
reur que ledict Concile condamna
en la

en la session huictiesme.

Gregoire de Valence, homme de
sçauoir eminēt, comme en fait preu-
ue le tesmoignage public que luy
ont rendu l'Italie, l'Espagne & l'Alle-
magne, escriuant sur la seconde par-
tie de saint Thomas, question 64.
& se conformant à la doctrine des
autres Theologiens de l'eschole, de-
termine qu'il n'est nullement permis^{2.2.7.}
d'attenter sur la vie du Prince, iacoit^{9.64.}
qu'il abuse de son autorité.^{disp.}
^{5.7.8.}

Alphonse Salmeron au 13. tome de
ses œuures, exposant le 13. chapitre de
l'Epistre aux Romains, enseigne le
mesme; cite le Concile de Constance,
& rapporte le faict d'Aod sur Eglon
Roy des Moabites, au commande-
ment de Dieu exprés & manifeste,
duquel personne ne peut estre le lu-
ge en son particulier.

Martin del Rio, qui s'est pareille-
mēt signalé, par toute sorte de bons

escrits, en ses cōmentaires sur l'Her-
cules furés de Seneque, nombre 920.
dict que la sentēce du Poëte est peril-
leuse, & allegue au contraire le de-
cret du Concile de Constance, qui
ne peutestre trop souvent inculqué,
reiteré, & déclaré au peuple en ceste
matiere.

Sebastien Heissius en la declara-
tion Apologetique des Aphorismes
attribuez à la doctrine de Iesuites,
monstre par les propres paroles de
Mariana, qu'il a parlé de fa teste, &
que luy mesme s'aperceuant qu'il ex-
cedoit les limites de la doctrine com-
mune, auoit recogneu qu'il estoit
subiect à erreur, & s'estoit soubmis à
la césure de qui que ce fust; immēdia-
temēt apres il apporte sō opiniō & la
commune de tous les Theologiens
de nostre Compagnie, qu'il contre-
poincte à celle du dict Mariana.

Martin Becanus en la responce au

9. Aphorisme, renuoye le Lecteur au Concile de Constance, monstrant que le Prince legitime, ne perd sa superiorité encore qu'il deuienne Tyran.

Iacques Gretserus Lecteur en Theologie à Ingolstad, en son liure intitulé *Vespertilio Hæreticopoliticus*, respondant aux obiections qui luy auoient esté faictes sur l'opinion de Mariana, dict avec Heissius, qu'il se faut tenir à la commune, laisser la particuliere de Mariana, & queluy mesme l'a soubmise à celle des autres.

Leonard Lessius Lecteur en Theologie à Louuain, au liure second *De Iustitia & iure*, chapitre neuuesme, doute quatriesme, s'accorde pareillement à la sentence commune; qu'il n'est loysible d'entreprendre sur la persône du Prince, encores qu'il abuse de son pouuoir, appuyant son di-

re sur l'aduertissement du Prince des
Apostres) *Serviteurs soyez subiects à*
vos Maistres & non seulement aux bons
& modestes, mais aussi aux aspres & fa-
cheux; Puis il allegue le decret sus-mé-
tionné du Concile.

Nicolas Serier, escriuant sur le cha-
pitre troisieme du liure des Iuges, en
la premiere question, monstre que le
faict d'Aod ne peut, & ne doit seruir
de preiugé ou exemple aux detesta-
bles assassins, parricides & meurtriers
de leurs Roys.

Iean Azor en la 2. partie de ses In-
stitutions morales, liure ynziesme,
chapitre cinquiesme, question dixié-
me, se monstre encores plus ennemy
de l'audace & des sacrileges atten-
rats de ceux qui entreprennent sur la
vie des Princes; enseignant qu'il n'est
mesme loisible d'attenter sur la vie
de ceux qui seferoiét iniustemét em-
parez de quelque estat; fondant son

dire principalement sur ce que personne ne doit estre condamné sans estre ouïy, & sans cognoissâce de cause, de laquelle aucun particulier n'est iuge competent.

Quant à Lois Richeome, ses Apologies font preuue peremptoire de la hayne irreconciliable qu'il porte à la doctrine de ceux qui dogmatisent contre l'authorité des Roys, de sorte que le sieur Pasquier mesmes, critique Censeur de ses œuures, apres auoir rapporté ses paroles, au liure 3. chap. 5. le louë & dit, qu'il ne peut qu'il ne l'ayme, adioustant ces paroles, *Encor faut-il que ie t'honore te voyant pourtraire l'idée de l'obeissance que le suieſt doit à son Roy.* Louâge qu'il eust peu donner à plusieurs autres de la mesme societé, lesquels apres auoir examiné cette matiere avec S. Thomas & toute l'Eschole, cōcluent tous cōformemēt à la Sorbone & a ce qu'ea determiné le cōcile de Cōstance.

44

Tel doncques estant le sens & telles les sentences de ces Docteurs, graues & signalez de nostre Cōpagnie, quel preiudice peut apporter l'opinion particulere de Mariana à la reputation de tout vn Ordre, lequel estant selō son Institut, extrêmement ialoux de la manutention des sainctes ordonnances del'Église, & respectāt la puissance & autorité des Roys, qui pour le temporel releuent de Dieu seul, a des lōg temps desauoué la legereté d'vne plume efforcee, & nommément en la Congregation Prouinciale de Frâce tenue en cette ville de Paris, l'an 1606. où d'abōdant le Reuerend Pere Claude Aquaiua General de nostre Compagnie fut requis, que ceux qui auoiēt escrit au preiudice de la Couronne de Frâce, fussent reprimez & leurs liures supprimez: Ce que ledit Reuerend Pere a faict depuis fort serieusement & exactement, tres-marry que par

mesgarde, en son abséece, & sans auoir
veu l'œuure on se fust seruy de son ad-
ueu: Les paroles d'ot. il ysa en sa respô-
se sont telles. Nous auôs approuué le „
iugement & le soin de vostre Cōgre- „
gation, & auons esté grandement at- „
tristez, quel'on ne se soit apperceu de „
cela qu'apres l'impression de tels liu- „
res: lesquels toutes-fois nous auons „
foudain commandé d'estre corrigez „
& aurons soin tres-exacte deormais „
que telles choses n'aduiennent. „

De faict à grand' peine trouueroit
on maintenant vn seul exemplaire de
Mariana, n'eust esté la pernicieuse li-
beralité des heritiers de Vvechel, que
lon scait estre de la Religion preten-
denduë reformee, qui l'ont faict im-
primer à leurs propres cousts, non tât
poussez, comme il est aisé a presumer,
du desir de seruir le public, que de nu-
yre au particulier de nostre Compag-
nie. Aucuns ont estimé qu'ils y a-

uoient adiousté du leur; , autres, que ceux de la premiere impressiõ estoient encore pires : controuerse qui ne sert de rien : car quand ainsi seroit, & que l'on n'auroit presté aucune charité à ceste plume mal taillee, il n'y a aucune raison pour laquelle elle doive plus tost incommoder le corps de nostre Societé, que les escrits de Iean Petit, & autres, les Vniuersitez, & Ordres dont ils estoient Escholiers, Bacheliers, Maistres & Docteurs.

Mais d'autant, Madame, que j'ay promis cy-dessus d'exposer clairement & distinctement quelle est nostre creance touchant la matiere proposee, ie viens à ce point, qui fera la derniere part de ceste déclaration.

I. Tous les Iesuites en general & en particulier signeront, voire de leur propre sang, qu'ils n'ont en ceste matiere, ny autre quelcõque, autre foy, doctrine, opinion,

opinio que ceste del'Eglise vniuerselle. 2. En secôd lieu qu'entre toutes les sortes de gouuernement & administratiô publique, la Monarchique est la meilleure.

3. Que tel est le gouuernement spirituel del'Eglise, qui se rapporte au Vicaire de Iesus-Christ successeur de S. Pierre, tel le temporel del'Estat & Royaume de France, qui se termine à la personne du Roy nostre Souuerain Seigneur & Maistre.

4. Que les Roys sont, comme les apelloit Homere, les enfans & nourrissons de Dieu; ou plustost, *son image animee*, comme disoit Menandre.

5. Qu'ils sont *oings*, & partant surnommez les Christs du Seigneur, afin (dit Simeon Archeuesque de Thessalonique) que chacun entende qu'ils sont inuiolables, & doiuent estre respectez comme choses saintes & sacrées.

6. Que c'est vne dānable heresie, ainsi
^{l. 5.}
^{c. 24} que l'a remarqué saint Irenée, il y a
14. cents ans, de croire que les Roys
soient donnez aux hommes par cas
fortuit, attendu que toute puissance
vient de Dieu. Et pour ce, dict saint
Isidore de Damiette, és plus ancien-
nes peintures nous voyons vne main
sortant du Ciel qui leur met vne Cour-
ronne sur la teste.

^{Rom}
^{32. 1} 7. Que qui resiste aux Roys ou se re-
belle contr'eux, il acquiert sa damna-
tion, selon la doctrine de l'Apostre.

8. Que l'obeyssance leur est deuë, non
pource qu'ils sont vertueux, sages,
puissans, ou doüez de quelques autres
louables qualitez; mais pource qu'ils
sont Roys establis de Dieu.

9. Que nos Roys en France sont les
aisnez de l'Eglise, douez de priuileges
rares & signalez par dessus le commun
des autres Roys de la terre.

10. Qu'il n'est loisible de leur desnier

obeyffance, & beaucoup moins de se
reuolter contr'eux, encore qu'ils
fussent vitieux, difficiles à supporter,
& discoles, comme parle le mesme
Apostre.

11. Qu'en tel cas on doit prier pour
eux, comme le Prophete vouloit qu'il
fust fait pour la prosperité de Nabu-
chodonozor, & de son fils Baltazar;
& que les afflictions, pertes de biens,
persecutions, & autres incommodi-
tez que l'on endure patiemment, sans
se rebeller pour cela contre les supe-
rieurs, sont choses tres-aggreables à
Dieu, & conformes à la loüange; qu'en
pareil cas S. Paul dône aux Hebreux,
& à l'Ordonnance qu'il a publiée en
l'Eglise, disant, *Que toute ame soit sui-
ette aux puissances superieures.*

12. Et partant, que non seulement il
n'est point loisible d'attenter sur leurs
personnes, mais que c'est vn execrable
parricide, forfait prodigieux, & dete-

stable sacrilege.

13. Que le decret du Concile de Constance en la session 15. doit estre receu de tous & maintenu inuiolable.

14. Que la declaration de Sorbone de lan 1413. & celle du 4. Iuin de la presente annec est saine, saincte, & salutaire.

15. Que chacun doit estre aduerty de prendre garde à plusieurs liures qui courét cõtre les Edicts, la lecture desquels est non seulement en ceste matiere grandement dangereuse, mais d'autant plus à craindre que leurs auteurs s'estans, à nostre extreme regret separez de l'Eglise Catholique, ne content pour rien le Concile de Constance, les censures Catholiques, & les Docteurs sus-mentionez; ains ce qui est à deplorer se fortifient dauantage en leurs opinions par leur oppositiõ, & semblent se rendre d'autat plus recommandables à leurs admirateurs,

I'en marquerois les endroits, speci-

fierois les passages, & alleguerois les paroles, nestoit qu'il vaut trop mieux qu'elles demeurent englouties dans l'abyfme de l'oubly, & qu'il est plus à propos de faire voir que l'innocence a de meilleures armes que la recri-
mination.

Et pour ceste raison encore me ferois ie abstenu du tout de cet aduertissement, n'eust esté pour monstrier que le corps de nostre Compagnie ne peut estre infecté par l'opinio d'un seul, lequel elle a si authentiquement desaduoué, non plus que ceux de la Religion pretenduë reformee ne se sentent aucunement interessez par la doctrine erronee de quelques vns des leurs, lesquels ils reiettent, desaduouent & condamnent; voulans viure avec nous sous les loix du Royaume, & avec l'obeissance & volontaire soubmission que nous rendons au sceptre de nos Roys: me persua-

22
dant que s'ils auoient la plume que
i'ay en main, ils diroient avec nous, &
fulmineroient d'une commune voix
contre tels infames auteurs, anathe-
me. Ce que meurement & sagement
côsidéré, tât par la Cour de Parlemēt,
que par le sacré College de Sorbone,
ils n'ont fait aucune mention en leur
arrest & decrets, de la doctrine des
Iesuites: Scachans tresbien, comme
Iuges & Docteurs equitables, que
les fautes sont personnelles, qu'il n'y
auroit point d'innocence au monde
si la coulpe de l'un estoit imputee à
l'autre, & que ç'a esté vne deplorable,
& incommunicable propriété du pe-
ché que cômît le premier hôme, d'a-
uoir eu son estenduë sur les autres, à
cause que sa posterité estoit represen-
tee en sa personne, Scachans aussi
d'ailleurs par la reiteree depositio du
malheureux, que Mariana n'auoit en
rien contribué à l'exécrable parri-

cide, & ne l'auoit peu faire, attendu
que ce meschant n'auoit suffisante in-
telligence de la langue en laquelle so-
liure estoit escrit. En quoy se descou-
ure la peu charitable intention de
ceux qui vont disant, qu'il le sçauoit
tout par cœur, afin de reietter la hai-
ne publique de ce malheur sur autres
que sur le coupable. C'est donc en
cet endroit MADAME, où vous estes
treshumblemēt suppliee d'employer
vostre supreme autorité, & ordon-
ner que tous ces escrits, qui sont au
commencement allumettés de rebel-
lion, & en peu d'heures deuiennent
flambeaux de sedition, soyent ostez
de deuant les yeux des François. Vous
estes nostre souueraine Dame doüee
de Dieu d'un entendement sublime,
& d'une vertu qui a peu de sembla-
bles, & qui voyez clairement de cō-
bien il importe que nous vniōs vnis;
puis que ce n'est en mesme foy, à cau-

se de l'iniure du temps, du moins en
fidelité, obeissance, & mutuelle affe-
ctiō à la cōseruation de la paix. Nous
auons vn Roy qui nous represente
en son bas aage l'esprit & la substance
du grād Héry son Pere, vostre espoux,
& qui avec l'accroissement des an-
nees aura, moyennant qu'il plaise à
Dieu continuer sur luy les benignes
influences, sa valeur, sa prudence, son
bon-heur, & son experience. C'est à
nous de cherir ce thresor, seruir de
bon cœur ce grand & petit Maistre,
& obeir volontiers à vous, sa tres-ho-
noree mere, nostre Regente & Mai-
stresse. Et afin que rien ne trouble l'v-
nion, qui seule peut, apres Dieu, con-
seruer ceste puissante Monarchie, &
la rendre tousiours redoutable à ses
ennemis; combien seroit-il desirable
MADAME, que l'on n'apperçeust par-
my nous aucunes mesdisances, que
l'imposture fust bānie, les imposteurs
receussent

receussent le salaire deu à la calomnie,
les rancunes fussent desracinees , &
quand quelque sinistre rapport nous
est fait , l'on suspendist le iugement:
Et en vn mot que selon le conseil de
l'Apostre , l'on maintint inuiolable
le lien de charité.

Les Otacoustes & Profagogides
de ce temps sont grandement à crain-
dre ; aussi sçait on asseuremēt qu'il ne
tiendrait à vostre Majesté , que telles
langues ne receussent la recompense
des anciens Quadruplateurs. Mais
s'ils ne la reçoient des hommes, ils la
doient attendre de la iustice inéuita-
ble de celuy qui est l'Auteur , Prote-
cteur, & en fin Remunerateur d'innocence.

Nostre petite Compagnie est entre
& sur toutes les familles Religieuses
la plus exposée à la haine & à la calom-
nie de ceux qui ne prennent la peine
de la cognoistre : & vous sçavez, Ma-

26
dame, combien de fois le feu Roy nostre bon maistre luy a fait ceste faueur de la defendre & faire recognoistre: vous pouuez tesmoigner, & persône ne scait mieux que vous, que là où se trouuoit ce grand Prince nous y auions vn Roy, vn Pere, vn Protecteur. Mais helastil n'est plus! le grand Henry nous a esté rauy!

O France, œil de la Chrestienté, rose des Empires, & la perle du monde; que ceste perte est grande pour toy! que ce naufrage est horrible! France la fauorie du Ciel & la bien aymee de Dieu, qui t'a osté le mâteau de gloire qui te couuroit, & la Couronne d'honneur qui se releuoit si hautement sur ton chef? qui t'a ainsi, la choisie de Dieu, qui t'a ainsi affligée? Mais toy pauvre Societé qui ne subsistois que par les benefices de ce Monarque, qui t'a ainsi desolee! si deplorablement abaissée! si miserablement accablée! le

malheur est commun à to⁹, mais il est
singulierement particulier à toy ; ce
coup a frappé tout le corps du Roy-
aume, mais il t'a nauré presque mor-
tellement. O combien il est vray, &
combien sensiblemēt tu l'experimen-
tes, que la douleur qui se peut dire, ne
se peut dire douleur ! Et moy qui es-
cris ces choses combié ay-ie de raison,
voire plus que tout autre, de me laisser
aller aux tristes accents d'une voix es-
plorée, & de dire, Adieu ô la mer-
veille des Roys: Adieu l'ornement du
siecle, nostre ioye, nostre gloire, no-
stre honneur : Adieu Pere de la chose
publique ; Restaurateur del'Estat, se-
cond Fondateur & premier bien-fa-
cteur de nostre Compagnie. Adieu
mon Roy, mon Prince, mon Defen-
seur. Vous nous auiez donné en
ceste vallee de larmes le repos que
l'on y peut auoir, reposez dōc en paix,
soyez à iamais entre les lis & les roses,

deliuré de la charge espineuse de ceste
Monarchie: Iouïſſez bien-heureux nô
de la terte, mais du Ciel: Icy vous auez
eſté le ſujeſt tres- eminent de la gra-
ce de Dieu, ſoyez là haut maintenant,
& pour touſiours l'obiet de ſes miſe-
ricordes. Les lauriers de ceste terre
baſſe fleſtriſſent trop aiſement, voſtre
chef en attendoit de plus verdoyants.
Les victoires, les triumphes, & les Em-
pires qui vous regardoiēt icy-bas, de-
uoient eſtre changez en vne plus emi-
nente gloire. Viuez donc à iamais
iouïſſant de ceste poſſeſſion tant deſi-
rable. Voſtre bon heur nous fera reſ-
pirer, voſtre abſence nous fera ſouſ-
pirer, & le lieu où nous eſtimons que
vous eſtes nous y fera aspirer. Car, ap-
puyez ſur la miſericorde de Dieu,
les funeſtes circonſtâces de voſtre de-
cez ne nous oſtēt l'eſperance de vous
reuoir au beau ſeiour d'un commun
iour, là où nous trouuerons le

principal & les apports de ce facheux
diuorce. Et pendant l'ennuy de ceste
attente, vous, Madame, avec le Roy
sa viue image, essuieriez vne partie de
nos larmes: No⁹ recognoistrôs sa per-
sône en vos persônes; sa Courône en
vos Courônes; & sô autorité Royale
en la vostre. Et bié que tous vos sub-
iects y foyent tenus par toute sorte de
deuoirs, nostre Compagnie y estant
extraordinairement obligee, me char-
ge de presenter aux pieds de vostre
Maiesté les plus sinceres vœux de sa fi-
delité & plus affectueuses offres de sô
tres-humble seruice, Ce que ie fais,

MADAME, d'autant plus volon-
tiers que ie suis d'un ressentiment sin-
gulier,

De V. M.

*Le tres-humble seruiteur, tres-
obeissant, & tres-fidele subiect,*

PIERRE COTON, de
la Compagnie de
IESVS.

Extrait du Priuilege du Roy.

PAr grace & priuilege du Roy, il est permis à Claude Chappelet, Libraire iuré en l'Vniuersité de Paris, d'imprimer, ou faire imprimer & mettre en vente vne Lettre Declaratoire de la doctrine d's Peres Iesuites conforme aux decretz du Concile de Constance, adressede à la Royne mere du Roy Regente en France. Par le P. P. COTON, de la Compagnie de IESVS, Predicateur ordinaire de sa Maieité. En faisant deffences tres-expresses à tous Libraires, & Imprimeurs ou autres de quelque qualité & condition qu'ils soyent, d'imprimer, ou faire imprimer ladite lettre, vendre ou faire vendre, debiter, ny distribuer par nostre Royaume, ny ailleurs, durant le terme de six ans, sur peine aux contreuenans, de confiscation des exemplaires, & d'amende arbitraire, & de tous despens, dommages, & interests, cōme il est contenu és lettres données à Paris, le 26. Iuin 1610. signees & scellées du grand sceau en cire iau-

- Par le Roy en son Conseil.

POVSSEPIN.

